



DEO OPTIMO MAX.

UNI ET TRINO.

VIRGINI DEIPARÆ, ET S. LUCÆ  
Orthodoxorum Medicorum Patrono.

QUÆSTIO MEDICA,

QUOD LIBETARIIS DISPUTATIONIBUS  
*manè discutienda, in Scholis Medicorum, die Jovis trigesimo  
Januarii, anni M. DCC. XXXVIII.*

M. PETRO AFFORTY,  
Doctore Medico, Præfide.

*An, pro distinctis agris, agritudines diversæ?*

I



EMOCRITUS ab *Heracito*, si personā distinguitur;  
specie tamen non differt. Uterque, homo: corpore pariter  
& animā constat; vultu licet, aut corporis habitu, diver-  
sus. Mortalis, quid intersit mortali, non omnes callent.  
Alterum ab altero ex facie internoscere, cuius vel bardo  
promptum. Quod ad communem omnium naturam perti-  
net, assequi etiam potest vel mediocriter eruditus; singulorum verò  
propriam introspicere, pervidere, omnique ex parte exploratam habere  
constitutionem, ne quidem factus ad unguem Medicus. Vulpeculæ pa-  
A

rùm absumiles, lambimus vitreum vas, pultem haud attingimus. Expediat aliquis, ex quo, sedenribus in concilio cordatis viris, tanta sit de re unâ, opinionum disjunctio? Undè, tam varij palati convivæ, tam diversa expectant edulia? Quamobrem, alii carnes, pisces alii, nonnulli vinum tantoperè oderint; dùm liquoris hujus capti dulcedine plurimi, non aliam vitæ voluptatem esse putant? Cur, iste ad casei, hic ad leporis, ille ad rosæ conspectum, cohorrescat, atque contrahatur? Quâ vi, senem hunc vehementer adeò urit æstus Cupidinis; in quo, adolescens ille, florentis etiam ætatis & corporis, omninò friger? Quâ de causâ, huic sint lachrymæ, doloris ac misericordiæ testes; illi autem, risûs & hilaritatis? Tot, tamque dissidentium effectuum eadem, quæ sanitatis, & morborum, causâ: simplicium videlicet corporis partium dispositio mechanica; organicarum eerta conformatio; determinata omnium functio; consociatio, unio, conspiratio que singularis.

## I I.

**M**UNDUS, ut & homo, ineluctabili naturæ legi obtemperat. Utrique sui natales, progressus, senectus; uterque *quaternionum*, seu tempestatum anni, vim experitur. In homine pax, bellum, induciæ. Triplex enim, ad mentem veterum, status hominis considerandus venit; sanus nempe, neuter & morbosus: quibus tota continetur ars medica. In statu sano, pax: si nimis non perfectus. In perfecto, mora difficilis: receditur, si non proceditur. Hinc patet periculis *vixit*. In neutro induciæ. In morbo, bellum. Morbi, fatales à natura leges quamvis habeant, ita tamen pro distinctione personarum à se invicem dissentiant, ut morbum, in omnibus, alteri morbo similem reperire arduum sit, ne dicam impossibile. Quemadmodum è paucis numero litteris diversissimè compositis, ingens nascitur vocabulorum multitudo; sic è simplicissimis partium corporis, vel solidarum staminibus, vel fluidarum moleculis, vario modo inter se, aut contortis, aut permixtis, tot, tamque disparates emergunt hominum constitutiones ac temperies, quot & quàm diversæ facies eorumdem, aut formæ discernuntur. Ab hac intima & peculiari unius cujusque naturâ repetendi sunt effectus multiplices, quos tamen admirari aliquatenus facilius, quàm enodare. Nec aliud profectò est, quòd nunc mas, nunc femina prodeat in vitæ scenam; quòd natorum etiam eadem horâ, & geminorum sanitas ingeniumque adeò discrepent; quòd stabilis constansque sit unius valetudo; alterius prostratus vitrea, æquè splendens, ac fragilis; quòd quibuscumque nihil in victu delinquentibus, angustioris vitæ sifcalus decurrat quàm celerissime; aliis diutius, etiam perturbatè, in vitâ manentibus; quòd venientes ac recedentes anni, multa secum ferant comoda, vel incommoda.

## I I I.

**A**B eodem constitutionis, ac temperiei fonte, morbi trahunt originem. Par sanitatis & ægritudinum ratio. Quilibet mortalis, quem totum à nativitate morbum esse pronuntiavit *Hippocrates*, bellum continuò

fovet intestinum: id alunt res naturales & non naturales. Hinc, juxta neotericos aliquot, morbus parùm à sanitate distat. In utroque scilicet statu laborat natura, niturque, vel quod noxium est foràs expellere, vel quod est devium, ad recti normam revocare. Calor aut motus, qui vitæ genitor fuit atque conservator, author sit & necis. Sanus igitur dicendus homo, ubi minoribus urgetur ærumnis ac miseriis; ægotare verò, cum, vel temperiei, vel conformationis, vel solutionis continui vicio quodam gravissimo detinetur. Hæc tria vulgò statuuntur summa morborum genera, à quibus nisi, qui ad curandum accedit, descendat per subiectos gradus ad infima, sua ipsi ars inanis futura est: quamvis ad manum sint omnia, quibus morbus *aut vult* debet oppugnari, præsidia. Ut planè unus ille sanos homines perspectos habet, cui, quid commune sit omnibus, quidque proprium singulis, penitus notum est; ita, is tantùm eximiè medentis personam sustinet, qui communem ac totam morbi cuiusque notionem, insuperque singulari illa, quæ in nullum alium hominem convenire possunt, gerit in animo consingnata. Quot præterea modis inter se variant ægritudines, ratione sexus, ætatis, conditionis, regionis, anni tempestatis, consuetudine ac vivendi genere; aliisve innumerabilibus adjunctis, quibus animalis œconomia multifariam alterari valet atque labefactari?

## I V.

**P**ATHOLOGIÆ prima pars, morborum differentias præsertim investigat. Mirum sanè, quot ab authoribus generales inventæ fuerint pravorum affectuum classes, ad quas, læsiones quaslibet singulorum, referri posse judicaverant. At ægritudinum sive naturam aut essentiam, sive proprietates aut accidentia perpenderis attentius, nonne morbos, speciei quantumvis ejusdem, longè multumque inter se discriminari fateberis? Quàm difficilis enim est, quàm lubrica & operosa similitudinum, peritis etiam imponentium, aut dissimilitudinum intelligentia? Vis illud, in apertam lucem vocatum, antè oculos tibi statuere? Latè fuscum febris nomen, [ ut inde specimen capiatur, ] sit licet ad eam, quæ quarto quoque torret die, contractum; adhuc vana est imago morbi, cujus mille discrimina: quapropter cave de illius moribus, exitu, & curatione quidquam ante proferas, quàm liqueat, sit domesticus, nec ne; quâ parte anni, quâ ratione degentem corripuerit; tenuis, an firmæ valetudinis hominem, puerum, juvenem, annosumve senem; marem, an feminam: hancque, gravidam, puerperam, vel intactam; illum, gracilem, an obesum; ocio dissucentem, an curis, aut labore confectum exerceat; quo sub celo is natus, educusque sit; quale solum calcet; quem ore ducat aërem; quibus se pascat cibis; an hos, aut illos appetat, vel nullos. Neque hic consistendum: ipsa quippe, quæ febrem circumstant mala, ejus quoque produnt ingenium; scire ut permagni referat, paucarum sit, an multarum horarum; sub eâ ne integra sint, an corrupta, aut effata viscera; num vomitus, tussisque ægrum quatiant; fusior sit, subsistat ne alvus; adsint sitis, sudor, vigilæ; an contra, veternus

occupet. Quis autem hæc omnia, <sup>4</sup> ut in hominum genus universum cadere queant, nullo non variari in corpore, negaverit?

V.

**C**UIVIS itaque mortalium, sua ut propria indoles, suis ut genius; sic & sui morbi. Quàm dispar sanorum constitutio, temperies, & natura; tam dissimiles ægrorum, ægotationumque formæ, ac species. Quàm multiplex latentium intrinsecus fibrillarum, aut humorum conditio, tam varia inde exortorum affectuum ratio. Hinc tantus labor, totque exorbendæ difficultates ritè medendi scientiam professio: ut, nisi hæc singula venetur, & intento animo cernat, agitet, atque ad invicem comparet, suum cuique malo remedium aptaturus, medici titulum temerè sibi arroget. In ultimas igitur terras exportentur eorum omnium rudes isti homunciones, verius fungi, qui, naturæ quoque rotius ignaros homines, sapiùs, magnas inter opes, à rectâ mente inopes, perniciosè ludificant: unico adversus quaslibet ægritudines nunquam non usi pharmaco. Omnibus enim hominibus, etiam sanis, si non conveniat una eademque vivendi norma: quî, morbis eorumdem curandis, unum idemque remedium tutò poterit accommodari? Cum immo, vel ejusdem speciei distinctas ægritudines, adhibito indiscriminatim specifico, ut aiunt, medicamento, sapissimè non sanari, quotidianâ constet experientiâ. Non itaque sapiet in rebus medicis; nisi qui primùm, consideraverit hominem intrinsecus & in cute; dein, quanta sit in eo, ex ætate, sexu, habitu, educatione, statu, exercitiis, solo, victu, regione, varietas; postea, quàm diversis pravorum affectuum, tum corporis, tum animi, generibus is oppugnetur; ac tandem, nobiscum concluderit.

*Ergò, pro distinctis ægris, ægritudines diversa.*

#### DOMINI DOCTORES DISPUTATURI.

*M. Joannes Isoard.*

*M. Henricus Guyot.*

*M. Michael Ludovicus Re-  
neame, Exdecanus,  
Censor Academiæ & Re-  
giæ Scientiarum Aca-  
demiæ Socius.*

*M. Bartholomæus Murry.*

*M. Tuffanus - Gilbertus  
Boulland.*

*M. Raymundus-Jacob Finot.*

*M. Carolus Payen.*

*M. Gaspar Cochon du Puy,  
in Arce Maritimâ Ru-  
pisoriensis Anatomæ,  
& Chirurgiæ Professor  
Regius.*

*M. Ludovicus Lemery, Me-  
dicus Regis Ordinarius,  
Regiæque Scientiarum  
Academiæ Socius, & in  
horto Regio Chymici Pro-  
fessor.*

Proponebat Parisiis, ANTONIUS FERREIN, Aginas,  
Baccalauræus Medicus, A.R.S.H. 1738. à 6<sup>a</sup> ad meridiem.